

রেখে যাবো কিছু স্মৃতি

ধীরে ধীরে যেন শেষ হয়ে আসে জীবন - যাপন খেলা
হাত কেঁপে ওঠে অবসাদ এসে ছোট করে দেয় বেলা
ভালো লাগেনাকো নিয়ম - কানুন কর্মের ঘানি টানা
ক্লান্তিতে যেন ছেয়ে যায় মন ভুল হয় সব জানা।

সব ভুলে গেছি কার পরে কী কোথা যেতে হবে আজ
বাজার ফর্দ পড়ে থাকে ব্যাগ, পড়ে থাকে বই কাজ,
তোমার মুখের প্রসাধনী ঘ্রাণ শরীরের মিঠা বায়ু
আমার কী বলো কমাতে বয়স? বাড়াতে বিয়োগে আয়ু?

সব ভিটামিন ব্যর্থ বুঝিবা জীবনদায়ী ড্রাগ ফেল
বোঁটা খসবেই, কাক উড়ে যায়, পেড়েছে পড়বে বেল
এ জীবন কেন নয় অনন্ত, কেন তবে হলো জন্ম
আমাদেরই দেখে হতাশায় ভাঙে আমাদেরই প্রজন্ম।

ভালো লাগেনাকো ছেড়ে যেতে এই এজমালি বসবাস
যেখানে নিয়েছি জীবনের স্বাদ বাঁচার রসদ শ্বাস
আহা, আমাদের চলে যেতে হবে যেতে না চাইলেও তবু
একী জীবদের পরিণতি এ কেমন বিধি প্রভু!

ঘরে চলে যাবো চলে যেতে হবে করে যাবো প্রতিবাদ
মরতেই হবে তবে কেন প্রভু চাখালে জীবন স্বাদ
তবু রেখে যাবো রেখে যেতে চাই কবিতা এবং স্মৃতি
মানুষের তরে মানুষের প্রেম রেখে যাবো স্নেহ - প্রীতি

হতাশায়

আমাকে আমার মতো থাকতে দেয়না তো কেউ
পরিপার্শ্ব সমাজ - সংস্কার তোলে বৈপরিত্য ঢেউ,

আমি যদি থাকি একাগ্র নিমগ্নতায় দণ্ডায়মান
সংসার সমস্যা এসে স্নায়ুতে ধরায় মৃদুটান,

অবশ্য সবুজ বৃক্ষ পাহাড় পর্বত আর নদী
আশা হাতছানি দেয় নীল নারী নিরবধি

পারিনাকো সেই সব আহবান দিতেসাড়া
লোভ - পাপ জটিলতায় হয়েপড়ি দিশাহারা

বিশ্বাসে - অবিশ্বাসে ক্রমে পরাজয়ে আমি
অবধারিত হতাশার সমুদ্র - বেদনায় নামি।

ঋণ

আমার এখানে জন্ম এই দেশে
এই সবুজ জাজিমে স্নিগ্ধতায়
সেখানে আকাশ নীল গাছের পাতায়
নেমে এসে পুনরায় আকাশেই মেশে,

আমার এখানে জন্ম মাটির দাওয়ায়
সাঁত সোঁতে সোঁদা সোঁদা লেবুফুল
পথের হাওয়ায় ওড়ে গুঁড়ো গুঁড়ো ধূল
আম - জাম কুল্ল চূড়ার মিষ্টি ছায়ায়

আমার এখানে জন্ম নীলনীলিমায়
যেখানে আকাশের তারাদের ফুল
আমার মায়ের রেশম কোমল চুল
আমাকে সম্বলে ঢেকে ঘুম পাড়ায়

আমার এখানে জন্ম এ দেশের মায়ায়
পাহাড় নদী আর বাতাসের কাছে
বৃষ্টি ধারার সুধা মাটি মার কাছে
আমার নিযুত ঋণ বাকি থেকে যায়।

বড় থামুক

তোমার শরীরে ওঠে বড়
অশান্ত ঘূর্ণির চর
তুমি তবু বাহিরে স্থির

বয়ে চলে ভিতরে লোনা নদী
সুরের আকাশে যন্ত্রণা
থেকে থেকে অসহায় কাঁদে

তুমি তো পাওনি কাউকে
যার কাছে উজাড় হবে
শুধু শুধু মুখ বুজে থেকে

মনের ভিতরে উত্তাল
শরীরের রোমে শিহরণ
কামনার রঙ গাঢ় হয়

তোমার শরীরে কতো জ্বালা
বুঝেও বোঝোনাকো কেউ
মনে মনে ছটফট করো

এসো সাহস করে কাছে
আমারও সংকেত আছে
পৃথিবীতে স্বর্গ নামুক